

BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE
DOM NARODA
Broj: 02-02-739/13
Sarajevo, 25.7.2013. godine

Z A P I S N I K

16. SJEDNICE DOMA NARODA PARLAMENTA FEDERACIJE BOSNE I HERCEGOVINE, održane 18. i 25.7.2013. godine

Sjednica je počela u 13.20.

Sjednici je predsjedavao Radoje Vidović, predsjedavajući Doma naroda Parlamenta Federacije BiH.

Na osnovu evidencije Stručne službe, predsjedavajući je konstatovao da sjednici prisustvuje 39 delegata, što čini većinu, te Dom naroda može raditi i punovažno odlučivati.

Predsjedavajući je podsjetio delegate da na osnovu člana 104. Poslovnika o radu Doma naroda mogu postavljati delegatska pitanja i pokretati inicijative, te izraziti nezadovoljstvo dobijenim odgovorom.

Delegatska pitanja i inicijative

Zoran Jovanović je izrazio nezadovoljstvo dobijenim odgovorom na pitanje da li je Pravilnik koji je donio Upravni odbor zavoda za penziono i invalidsko osiguranje Federacije BiH u skladu sa zakonom, te je isto pitanje ponovo uputio Federalnom ministarstvu rada i socijalne politike.

Drago Puzigaća je izrazio nezadovoljstvo odgovorom direktora Zavoda za penziono i invalidsko osiguranje Federacije BiH, te ponovo uputio pitanje Federalnom ministarstvu rada i socijalne politike a koje glasi: Kada će građani koji su ostvarili pravo na penziju prije raspada bivše Jugoslavije u mjestima Drvar, Glamoč i Grahovo i na području čitave Federacije a i sada tu žive, primati penzije iz Federacije.

Ivo Divković je izrazio nezadovoljstvo odgovorom predsjednika Federacije i ponovo ga upitao da li će podnijeti ostavku ako se utvrdi da su osobe koje je pomilovao učestvovala u činjenju krivičnih djela.

Zijat Mušić je izjavio da nije dobio odgovore na postavljena pitanja Federalnom ministarstvu za pitanja boraca i invalida odbrambeno-oslobodilačkog rata te ponovo predložio zaključak da se sazove vanredna ili tematska sjednica koja bi se odnosila samo na problematiku boračke populacije.

Dževad Rađo je, također, izjavio da nije dobio odgovor od Federalnog ministarstva za pitanja boraca i invalida odbrambeno-oslobodilačkog rata, te je podržao prijedlog Zijata Mušića.

Zoran Jovanović je uputio inicijativu Regulatornoj agenciji za komunikacije da povuče odluku kojom se javnim emiterima ograničava propagandni program na četiri minute u jednom satu. Također, uputio je inicijativu Federalnom ministarstvu obrazovanja i nauke da preporuči kantonalnim ministarstvima obrazovanja i nauke da izvrše dopune nastavnog plana i programa za predmet Historija na način da bi se uvela dva obavezna časa u Memorijalnom centru Potočari.

Drago Puzigaća je postavio pitanje Vladi Federacije i premijeru Federacije da li će i kada Vlada Federacije prilikom dodjeljivanja sredstava putem Federalnog ministarstva raseljenih osoba i izbjeglica i Federalnog ministarstva razvoja, poduzetništva i obrta ta sredstva realizirati za općine Drvar, Bosansko Grahovo i Glamoč.

Mladen Lonić je uputio pitanje Federalnom ministarstvu poljoprivrede, vodoprivrede i šumarstva kada će biti isplaćeni poticaji u poljoprivredi za 2012. godinu.

Ivo Tadić je zamolio Vladu Federacije i premijera Nermina Nikšića da se uključe u rješavanje problema porodice Čičak Šišić iz Zenice.

Esed Radeljaš je upitao Visoko sudsko i tužilačko vijeće u vezi sa privremenim mjerama koje je donijela sutkinja Lejla Fazlagić.

Josip Perić je postavio pitanje Ministarstvu prometa i komunikacija BiH - zašto je potrošeno 3,5 miliona eura za granični prijelaz Kamensko koji će služiti samo za prijelaz putnika a ne i za visokotarifnu robu.

Peđa Kojović je upitao predsjedavajućeg Doma naroda šta planira uraditi i da li misli staviti na glasanje njegovu inicijativu za promjenu Ustava Federacije BiH.

Sretko Radišić je postavio pitanje kada će se održati tematska sjednica u vezi sa konstitutivnosti naroda i kako će se primjenjivati ustavne odredbe o konstitutivnosti prilikom zapošljavanja u javnim službama.

Mijo Matanović je uputio pitanje JP Ceste Federacije BiH kada će i da li će ove godine početi izgradnja autoceste na sjeveru kao i gradnja mosta na Savi kod mjesta Svilaj.

Ekrem Prošić je postavio pitanje predsjedavajućem Doma naroda i predsjednici Kluba delegata srpskog naroda zašto još nije izabran potpredsjedavajući Doma naroda iz reda srpskog naroda.

Zahid Bašić je upitao Federalno ministarstvo poljoprivrede, vodoprivrede i šumarstva zašto u izradi Izmjena i dopuna Zakona o vodama nisu uključena resorna ministarstva svih kantona u Federaciji.

Potom se prešlo na utvrđivanje dnevnog reda.

Predsjedavajući je podsjetio delegate da je Vlada Federacije dostavila Prijedlog Zakona o izmjenama i dopunama Zakona o lovstvu sa prijedlogom da se razmatra po skraćenom postupku.

Predstavnički dom Parlamenta Federacije BiH je ovaj zakon razmatrao u formi nacrtu Zakona pa kolegij Doma naroda predlaže da i oni ovaj zakon razmatraju u formi nacrtu Zakona.

U raspravi o ovom prijedlogu Kolegija niko nije učestvovao.

Na osnovu rezultata glasanja, predsjedavajući je konstatovao da je Dom naroda Parlamenta Federacije BiH, sa 32 glasa za, uz jedan glas protiv i uz jedan uzdržani glas, prihvatio da se Prijedlog Zakona o izmjenama i dopunama Zakona o lovstvu razmatra u formi nacrtu.

Kolegij Doma naroda je predložio da se kao 1. tačka dnevnog reda razmatra - Potvrđivanje Odluke predsjednika Federacije o imenovanju sudije Ustavnog suda Federacije BiH - što su delegati, sa 36 glasova za i uz dva glasa protiv, prihvatili.

Predsjedavajući je upoznao delegate sa dopisom Vlade Federacije kojim se traži da se po hitnom postupku razmatra i donose Zakon o porezu na dohodak, te je, u ime Kolegija Doma naroda, predložio da se ovaj zakon uvrsti u dnevni red kao 14. tačka. Federalni ministar finansija Ante Krajina je obrazložio razloge hitnosti usvajanja ovog zakona.

Nakon toga predsjedavajući je stavio na glasanje ovaj prijedlog Kolegija i konstatovao da je Dom naroda prihvatio da se kao 14. tačka dnevnog reda 16. sjednice razmatra Prijedlog Zakona o porezu na dohodak.

Potom je predsjedavajući podsjetio delegate da je Vlada Federacije zatražila, a Kolegij Doma naroda predložio da se u dnevni red uvrste kao tač. 24. i 25. - Statut Univerzitetske kliničke bolnice Mostar i Statut Javne zdravstvene ustanove Univerzitetsko-klinički centar Tuzla - što su delegati Doma naroda, sa 39 glasova za i uz jedan uzdržani glas, prihvatili.

Budući da više nije bilo prijedloga za izmjenu i dopunu dnevnog reda, predsjedavajući je stavio na glasanje predloženi dnevni red i konstatovao da je Dom naroda, jednoglasno (42 glasa za), usvojio sljedeći:

D N E V N I R E D

1. Izbor i imenovanja:
 - Prijedlog Odluke o potvrđivanju Odluke o imenovanju sudije Ustavnog suda Federacije BiH;
2. Prijedlog Zakona o zaštiti jemaca u Federaciji BiH (predlagač: Aida Čikić, zastupnica u Predstavničkom domu Parlamenta Federacije BiH);
3. Prijedlog Zakona o izmjenama i dopunama Zakona o lizingu;
4. Prijedlog Zakona o izmjenama i dopunama Zakona o mikrokreditnim organizacijama;
5. Prijedlog Zakona o izmjenama i dopunama Zakona o bankama;
6. Prijedlog Zakona o izmjenama i dopunama Zakona o osnivanju Instituta za medicinsko vještačenje zdravstvenog stanja;
7. Prijedlog Zakona o električnoj energiji u Federaciji BiH;
8. Prijedlog Zakona o zaštiti prirode;
9. Prijedlog Zakona o poljoprivrednim savjetodavnim službama;

10. Prijedlog Zakona o stočarstvu;
11. Prijedlog Zakona o stvarnim pravima;
12. Prijedlog Zakona o izmjenama i dopunama Zakona o ministarskim, vladinim i drugim imenovanjima Federacije BiH;
13. Prijedlog Zakona o izmjenama i dopunama Zakona o cestama Federacije BiH;
14. Prijedlog Zakona o izmjenama i dopunama Zakona o porezu na dohodak - hitni postupak;
15. Nacrt Zakona o izmjenama i dopunama Zakona o lovstvu;
16. Nacrt Zakona o šumarstvu (predlagači: Slaviša Šućur i Enver Mujala, zastupnici u Predstavničkom domu Parlamenta Federacije BiH);
17. Nacrt Prostornog plana područja posebnih obilježja od značaja za Federaciju BiH „Sliv rijeke Une“ 2007.-2027. godina;
18. Nacrt Zakona o preuzimanju dioničkih društava;
19. Nacrt Zakona o unutrašnjim poslovima Federacije BiH;
20. Prijedlog Strategije razvoja industrije tekstila, odjeće, kože i obuće u Federaciji BiH za period 2013. – 2023. godina;
21. a) Izvještaj "Zdravstveno stanje stanovništva i zdravstvena zaštita u Federaciji BiH - 2011. godina" sa Odlukom o prihvatanju Izvještaja "Zdravstveno stanje stanovništva i zdravstvena zaštita u Federaciji BiH - 2011. godina",
b) Obračun sredstava u zdravstvu u Federaciji BiH za 2011. godinu sa Odlukom o prihvatanju obračuna sredstava u zdravstvu u Federaciji BiH za 2011. godinu;
22. Statut Zavoda za transfuzijsku medicinu Federacije BiH;
23. Statut Univerzitetskog kliničkog centra Sarajevo;
24. Statut Univerzitetske kliničke bolnice Mostar;
25. Statut Javne zdravstvene ustanove Univerzitetsko-klinički centar Tuzla;
26. Izvještaj Visokog sudskog i tužilačkog vijeća BiH za 2011. godinu.

**1. Izbor i imenovanja:
- Prijedlog Odluke o potvrđivanju Odluke o imenovanju sudije
Ustavnog suda Federacije BiH**

Odluku o imenovanju Edina Muminovića iz reda bošnjačkog naroda za sudiju Ustavnog suda Federacije BiH donio je predsjednik Federacije, uz saglasnost potpredsjednika Federacije i dostavio Domu naroda Parlamenta Federacije BiH radi potvrđivanja.

Komisija za izbor i imenovanja Doma naroda je razmatrala ovu odluku i sačinila Prijedlog Odluke.

Predsjednica Komisije za izbor i imenovanja Daliborka Milović je obrazložila Izvještaj Komisije. Komisija je konstatovala da su na Odluku o

imenovanju Edina Muminovića za sudiju Ustavnog suda Federacije BiH saglasnost dala oba potpredsjednika Federacije BiH, te da je prilikom donošenja Odluke o imenovanju sudije Ustavnog suda provedena procedura u skladu sa odredbama Ustava Federacije BiH. Komisija je predložila Domu naroda da donese odluku o potvrđivanju Odluke o imenovanju Edina Muminovića za sudiju Ustavnog suda Federacije BiH.

Nakon toga za riječ se javio potpredsjednik Federacije Mirsad Kebo obavjestivši Dom naroda da je završen i konkurs za popunu još dva mjesta u Ustavnom sudu Federacije BiH iz reda srpskog i hrvatskog naroda. Također, obratio se Ivi Tadiću i rekao mu da će iz granta koji mu stoji na raspolaganju izdvojiti 10.000 KM za rješavanje problema porodice Čičak Šišić.

U raspravi nije niko učestvovao.

Predsjedavajući je podsjetio delegate da je za imenovanje sudija Ustavnog suda Federacije potrebna potvrda većine glasova delegata Doma naroda, te je stavio na glasanje Prijedlog Odluke o potvrđivanju Odluke o imenovanju Edina Muminovića za sudiju Ustavnog suda Federacije BiH iz reda bošnjačkog naroda.

Na osnovu rezultata glasanja, predsjedavajući je konstatovao da je Dom naroda Parlamenta Federacije BiH, jednoglasno (47 glasova za), donio Odluku o potvrđivanju Odluke o imenovanju Edina Muminovića za sudiju Ustavnog suda Federacije BiH.

Nakon toga, predsjedavajući je, u ime Kolegija, predložio da se sjednica prekine a da nastavak bude 25.7.2013. godine - što su delegati i prihvatili.

Sjednica je prekinuta u 14:10.

NASTAVAK SJEDNICE OD 25.7.2013. GODINE

Sjednica je počela u 10.25.

Sjednici je predsjedavao Radoje Vidović, predsjedavajući Doma naroda Parlamenta Federacije BiH.

Na početku sjednice predsjedavajući je pozdravio delegate, federalnog ministra finansija Antu Krajinu, predstavnike Vlade Federacije BiH, predstavnike nevladinih organizacija i predstavnike akreditiranih medijskih kuća koji prate rad sjednice.

Izostanak sa sjednice opravdali su Ivan Brigić i Daliborka Milović.

Na osnovu evidencije Stručne službe, predsjedavajući je konstatovao da sjednici prisustvuje 39 delegata, što čini većinu, te Dom naroda može raditi i punovažno odlučivati.

Predsjedavajući je podsjetio delegate o preostalim tačkama dnevnog reda i prešao na rad.

2. Prijedlog Zakona o zaštiti jemaca u Federaciji BiH (predlagač: Aida Čikić, zastupnica u Predstavničkom domu Parlamenta Federacije BiH)

Predstavnički dom Parlamenta Federacije BiH obavijestio je Dom naroda da je na 14. vanrednoj sjednici, održanoj 26.2.2013. godine, usvojio Prijedlog Zakona u tekstu kako ga je predložio predlagač.

Vlada Federacije je dostavila Mišljenje o Prijedlogu Zakona.

Prijedlog Zakona su razmatrala nadležna radna tijela i dostavila izvještaje.

Prijedlog Zakona obrazložila je Aida Čikić.

U ime Vlade Federacije govorio je federalni ministar finansija Ante Krajina.

U ime Udruženja za zaštitu jemaca u Federaciji BiH govorio je gospodin Cvjetković.

Predsjednik Zakonodavno-pravne komisije Doma naroda Jasenko Tufekčić je obrazložio Izvještaj Komisije.

U raspravi su učestvovali: Zoran Jovanović, Adnan Jupić, Jasenko Tufekčić, Aner Žuljević, Amir Zukić, Josip Perić i Aida Čikić.

Budući da je u raspravi bilo prijedloga da se odloži izjašnavanje o ovom prijedlogu Zakona dok se predlagač ne usaglasi sa Vladom Federacije i drugim institucijama u vezi sa ovim prijedlogom, predsjedavajući je konstatovao da je, sa 41 glasom za i uz četiri uzdržana glasa, Dom naroda Parlamenta Federacije BiH usvojio sljedeći:

ZAKLJUČAK

Zadužuje se predlagač Zakona da u roku 45 dana obavi neophodno usaglašavanje ovog zakona sa Vladom Federacije BiH i drugim institucijama u skladu sa sugestijama i primjedbama danim na sjednici Doma naroda, nakon čega bi Dom naroda u septembru razmatrao ovaj prijedlog Zakona.

3. Prijedlog Zakona o izmjenama i dopunama Zakona o lizingu

Prijedlog Zakona utvrdila je Vlada Federacije.

Predstavnički dom Parlamenta Federacije BiH obavijestio je Dom naroda da je na nastavku 20. sjednice, održane 2.7.2013. godine, usvojio Prijedlog Zakona u tekstu kako ga je predložio predlagač.

Prijedlog Zakona su razmatrala nadležna radna tijela i dostavila izvještaje.

Prijedlog Zakona obrazložio je federalni ministar finansija Ante Krajina.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda Parlamenta Federacije BiH, sa 37 glasova za i uz dva uzdržana glasa, usvojio Prijedlog Zakona o izmjenama i dopunama Zakona o lizingu.

4. Prijedlog Zakona o izmjenama i dopunama Zakona o mikrokreditnim organizacijama

Prijedlog Zakona utvrdila je Vlada Federacije.

Predstavnički dom Parlamenta Federacije BiH obavijestio je Dom naroda da je na nastavku 20. sjednice, održane 2.7.2013. godine, usvojio Prijedlog Zakona sa jednim amandmanom koji Vlada Federacije nije prihvatila, ali ga je Predstavnički dom izglasao.

Prijedlog Zakona su razmatrala nadležna radna tijela i dostavila izvještaje.

Amandman se odnosi na član 18. Prijedloga Zakona.

Na Prijedlog Zakona sedam amandmana je podnio Amir Zukić, delegat u Domu naroda. Amandmani se odnose na čl. 3., 9., 10., 11., 12., 16. i 18. Prijedloga Zakona.

Amandmani su dostavljeni Vladi Federacije radi izjašnjenja.

Prijedlog Zakona obrazložio je federalni ministar finansija Ante Krajina.

U raspravi je učestvovao Amir Zukić i predložio da se odloži izjašnjenje o ovom prijedlogu Zakona dok se Vlada Federacije ne izjasni o njegovim amandmanima.

Na osnovu rezultata glasanja, predsjedavajući je konstatovao da je Dom naroda Parlamenta Federacije BiH, sa 30 glasova za, uz šest glasova protiv i uz devet uzdržanih glasova, usvojio sljedeći:

Z A K L J U Č A K

Odlaze se izjašnjavanje o Prijedlogu Zakona o izmjenama i dopunama Zakona o mikrokreditnim organizacijama dok se Vlada Federacije BiH ne izjasni o amandmanima koje je podnio Amir Zukić, delegat u Domu naroda Parlamenta Federacije BiH.

5. Prijedlog Zakona o izmjenama i dopunama Zakona o bankama

Prijedlog Zakona utvrdila je Vlada Federacije.

Predstavnički dom Parlamenta Federacije BiH obavijestio je Dom naroda da je na nastavku 20. sjednice, održane 2.7.2013. godine, usvojio Prijedlog Zakona u tekstu kako ga je predložio predlagač.

Prijedlog Zakona su razmatrala nadležna radna tijela i dostavila izvještaje.

Prijedlog Zakona obrazložio je federalni ministar finansija Ante Krajinina.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda Parlamenta Federacije BiH, sa 41 glasom za i uz pet uzdržanih glasova, usvojio Prijedlog Zakona o izmjenama i dopunama Zakona o bankama.

6. Prijedlog Zakona o izmjenama i dopunama Zakona o osnivanju Instituta za medicinsko vještačenje zdravstvenog stanja

Prijedlog Zakona utvrdila je Vlada Federacije.

Predstavnički dom Parlamenta Federacije BiH obavijestio je Dom naroda da je na nastavku 20. sjednice, održane 2.7.2013. godine, usvojio Prijedlog Zakona u tekstu kako ga je predložio predlagač.

Prijedlog Zakona su razmatrala nadležna radna tijela i dostavila izvještaje.

Prijedlog Zakona obrazložila je Zehra Novo-Omanović, pomoćnica federalnog ministra rada i socijalne politike.

Prije rasprave Domu naroda se obratio Zijad Krnjić, direktor Zavoda za penzijsko i invalidsko osiguranje Federacije BiH.

Predsjednik Zakonodavno-pravne komisije Doma naroda Jasenko Tufekčić je obrazložio Izvještaj Komisije i izjavio da je Komisija podnijela amandman koji se odnosi na brisanje člana 3. Prijedloga Zakona.

U raspravi su učestvovali: Mirko Batinić, Luka Faletar, zamjenik predsjednika Kluba delegata hrvatskog naroda, Zoran Jovanović, Amir Zukić, predsjednik Kluba delegata bošnjačkog naroda, Josip Perić, Vesna Saradžić, Jasenko Tufekčić, Aner Žuljević, Mira Ljubijankić, predsjednica Kluba delegata srpskog naroda, Zijat Krnjić, Zijad Hadžiomerović, direktor Instituta za medicinsko vještačenje zdravstvenog stanja i Zehra Novo-Omanović.

Na osnovu rezultata glasanja, predsjedavajući je konstatovao da je Dom naroda Parlamenta Federacije BiH, sa 38 glasova za, uz dva glasa protiv i uz četiri uzdržana glasa, usvojio amandman koji je podnijela Zakonodavno-pravna komisija Doma naroda a glasi.

„Član 3. Prijedloga Zakona se briše.“

Potom se glasalo o Prijedlogu Zakona.

Na osnovu rezultata glasanja, predsjedavajući je konstatovao da je Dom naroda Parlamenta Federacije BiH, sa 42 glasa za, uz dva glasa protiv i uz jedan uzdržani glas, usvojio Prijedlog Zakona o izmjenama i dopunama Zakona o osnivanju Instituta za medicinsko vještačenje zdravstvenog stanja.

Budući da je tekst Prijedloga Zakona o izmjenama i dopunama Zakona o osnivanju Instituta za medicinsko vještačenje zdravstvenog stanja usvojen u različitom tekstu u oba doma Parlamenta Federacije BiH **potrebno ga je usaglasiti.**

7. Prijedlog Zakona o električnoj energiji u Federaciji BiH

Prijedlog Zakona utvrdila je Vlada Federacije.

Predstavnički dom Parlamenta Federacije BiH obavijestio je Dom naroda da je na nastavku 20. sjednice, održane 2.7.2013. godine, usvojio Prijedlog Zakona sa tri amandmana Vlade Federacije, amandmanima II., III., V., VII., VIII., X., XI., XII., XIII., XIV., XVI. i XVII. Ive Divkovića, delegata u Domu naroda, i amandmanom Regulatorne komisije za električnu energiju u Federaciji BiH koje je prihvatila Vlada Federacije, pa su postali sastavni dio Prijedloga Zakona.

Vlada Federacije je djelimično prihvatila amandmane IV., IX. i XV. delegata Ive Divkovića koji su postali sastavni dio Prijedloga Zakona.

Prijedlog Zakona su razmatrala nadležna radna tijela i dostavila izvještaje.

Na Prijedlog Zakona Ivo Divković je podnio 17 amandmana. Izjavio je da prihvata izjašnjenje Vlade Federacije na njegove amandmane.

Prijedlog Zakona obrazložila je Amira Pintul, pomoćnica federalnog ministra energije, rudarstva i industrije.

Predsjednik Odbora za privredu Doma naroda Hajrudin Bećirović je obrazložio Izvještaj Odbora.

U raspravi su učestvovali Ivo Divković i Hajrudin Bećirović.

Na osnovu rezultata glasanja, predsjedavajući je konstatovao da je Dom naroda Parlamenta Federacije BiH, sa 36 glasova za i uz osam uzdržanih glasova, usvojio Prijedlog Zakona o električnoj energiji u Federaciji BiH sa sljedećim amandmanima:

Amandmani Vlade Federacije glase:

Amandman I.

U Prijedlogu Zakona o električnoj energiji u Federaciji BiH u članu 3. Definicije tačka 7) mijenja se i glasi:

“Energetska efikasnost/upravljanje potražnjom” znači cjelovit ili integralni pristup sa ciljem uticaja na količinu i vremenski raspored potrošnje električne energije radi smanjenja potrošnje primarne energije i vršnih opterećenja, davanjem prednosti ulaganjima u mjere za energetske

efikasnost li druge mjere kao što su ugovori o snabdijevanju sa prekidima umjesto na ulaganja u povećanje proizvodnih kapaciteta, ukoliko prve predstavljaju najefikasniju i najekonomičniju mogućnost, uzimajući u obzir pozitivan uticaj smanjenja potrošnje energije na okoliš, kao i sigurnost snabdijevanja i aspekt troškova distribucije koji su sa tim povezani, a što uključuje i smanjenje distributivnih gubitaka.”

Amandman II.

U Prijedlogu Zakona o električnoj energiji u Federaciji BiH u članu 3. Definicije tačka 8) mijenja se i glasi:

““Fizičko lice” je ono lice koje je registrirano u skladu sa Zakonom o obrtu za obavljanje djelatnosti proizvodnje električne energije u objektima instalirane snage do 150 kW.”

U članu 21. u stavu (1) tačka 17) mijenja se i glasi:

“17) pokretanje postupka za izdavanje prekršajnih naloga u skladu sa kaznenim odredbama zakona”.

U članu 28. dodaje se stav (2) koji glasi:

“(2) Okolnosti iz stava (1) tačke 2) ovog člana dokumentiraju se odgovarajućom potvrdom nadležnih sudskih organa, a okolnosti iz tač. 3), 5) i 6) izjavom izdatom pod materijalnom i kaznenom odgovornošću.”

Amandman III.

U Prijedlogu Zakona o električnoj energiji u Federaciji BiH član 26. Posebni uvjeti koje moraju ispunjavati članovi Regulatorne komisije mijenja se i glasi:

“(1) Pored općih uvjeta predsjednik i članovi Regulatorne komisije moraju ispunjavati, između ostalih, i sljedeće posebne uvjete za imenovanje:

- visoka stručna sprema iz oblasti inženjerstva, ekonomije ili prava sa odgovarajućim višegodišnjim profesionalnim iskustvom u energetsom sektoru;
- prethodno iskustvo i znanje po pitanjima vezanim uz energetske djelatnosti, posebno o pitanjima tehnologije, ekonomije, prava ili zaštite okoliša;
- sposobnost kreativnog doprinosa u reformi energetske sektora;
- dokazani uspješni rezultati rada tokom radnog iskustva;
- komunikacijske i organizacijske sposobnosti;
- sposobnost upravljanja finansijskim i ljudskim resursima i naklonjenost timskom radu, i
- znanje engleskog jezika ili nekog drugog svjetskog jezika.

(2) Predsjednik i članovi Regulatorne komisije moraju biti državljani Bosne i Hercegovine sa stalnim prebivalištem u Federaciji BiH.”

Amandman Regulatorne komisije za električnu energiju u Federaciji BiH koji je prihvatila Vlada Federacije glasi:

“U Poglavlju XXIII. PRIJELAZNE I ZAVRŠNE ODREDBE u članu 116. stav (7) mijenja se i glasi:

“(7) U skladu sa razvojem tržišta električne energije u Bosni i Hercegovini postojeća elektroprivredna društva u Federaciji BiH nastavit će sa proizvodnjom električne energije za nekvalifikovane kupce i snabdijevanjem nekvalifikovanih kupaca, a sve u okviru vršenja obaveze javne usluge.”

Amandmani II., III., V., VII., VIII., X., XI., XII., XIII., XIV., XVI. i XVII. Ivo Divkovića, delegata u Domu naroda, koje je prihvatila Vlada Federacije, pa su postali sastavni dio Prijedloga zakona glase:

Amandman II.

U članu 5. u stavu (2) dodaje se tačka 12) koja glasi:

“(12) Implementiranje međunarodnih obaveza u elektroenergetskom sektoru.”

Amandman III.

U članu 13. stav (7) mijenja se i glasi:

“(7) Kao dio obaveze javne usluge, elektroenergetski subjekti kojima je ta obaveza nametnuta u skladu sa stavom (1) ovog člana dužni su pružati univerzalnu uslugu snabdijevanja električnom energijom svim krajnjim kupcima iz kategorije domaćinstava, malim preduzećima i komercijalnim kupcima, na području njihovog djelovanja, u skladu sa elektroenergetskom politikom Federacije.”

Amandman V.

U članu 24. stav (8) mijenja se i glasi:

„(8) Pri imenovanju članova Regulatorne komisije mora se osigurati ravnopravna zastupljenost konstitutivnih naroda u Federaciji.“

Amandman VII.

U članu 29. u stavu (2) iza riječi: „kazneno djelo“ dodaju se riječi: „ili optužen za kazneno djelo zloupotrebe položaja i ovlasti“.

Amandman VIII.

U članu 39. u stavu (1) iza riječi: „posebno dogovore“ dodaju se riječi: „i obostrano zatraže“.

Amandman X.

U članu 52. u stavu (3) brišu se riječi: “i mrežnim pravilima distribucije”.

Amandman XI.

U članu 53. u stavu (5) brišu se riječi: “i direktne vodove”.

Amandman XII.

U članu 61. u stavu (2) u tački 1) briše se riječ: “kontinuiteta”.

Amandman XIII.

U članu 73. u stavu (3) iza riječi: “infrastrukture” dodati riječi: “bez naknade”.

Amandman XIV.

U članu 79. stav (6) se mijenja i glasi:

“Energetskom dozvolom se nosiocu dozvole utvrđuje obveza da primjenjuje savremene tehnologije u izgradnji i korištenju elektroenergetskog objekta.”

Amandman XVI.

U članu 83. dodaje se stav (5) koji glasi:

“(5) Krajnji kupac ima pravo zatražiti smanjenje ranije odobrene priključne snage, a operator distribucijskog sistema mu to pravo može omogućiti bez plaćanja naknade u skladu sa odbredbama općih uvjeta.”

Amandman XVII.

U članu 101. u stavu (4) riječi: “i u roku iz stava (2) ovog člana” zamjenjuju se riječima: “i u roku sedam dana prije početka radova”.

Amandmani IV., IX. i XV. delegata Ive Divkovića koje je Vlada Federacije BiH djelimično prihvatila, pa su postali sastavni dio Prijedloga Zakona, glase:

Amandman IV. koji je djelomično prihvaćen glasi:

U članu 21. u stavu (1) u tački 4) iza riječi: “održivost” dodaju se riječi: “i razvoj”.

U članu 21. u stavu (1) tačka 8) mijenja se i glasi:

“8) davanje saglasnosti na iznos naknada za priključak na distributivnu mrežu”.

U članu 21. u stavu (2) tačka 6) mijenja se i glasi:

“6) Ispunjavanje obaveza operatora distribucijskog sistema utvrđenih ovim zakonom i podzakonskim aktima.”

Amandman IX. koji je djelimično prihvaćen glasi:

U članu 46. u stavu (4) dodaje se nova rečenica koja glasi:

“Odobreni finansijski plan treba omogućiti normalno funkcioniranje distribucijskog sistema.”

Amandman XV. koji je djelimično prihvaćen glasi:

U članu 81. u stavu (1) na kraju teksta briše se tačka, piše zarez i dodaje tekst: “kao i zakonskom regulativom kantona”.

8. Prijedlog Zakona o zaštiti prirode

Prijedlog Zakona utvrdila je Vlada Federacije.

Predstavnički dom Parlamenta Federacije BiH obavijestio je Dom naroda da je na nastavku 20. sjednice, održane 2.7.2013. godine, usvojio Prijedlog Zakona sa amandmanom Vlade Federacije, 13 amandmana koje je prihvatila Vlada Federacije pa su postali sastavni dio Prijedloga Zakona i sa amandmanom koji Vlada Federacije nije prihvatila, ali ga je Predstavnički dom izglasao.

Amandman Vlade Federacije BiH

U članu 9. dodaje se stav 4. koji glasi:

„Poslove zaštite prirode iz nadležnosti općine vrše općinske službe koje se osnivaju u skladu sa Zakonom o principima lokalne samouprave.“

Amandmani koje je Vlada Federacije BiH prihvatila:

Amandman I.

U članu 8. uvrstiti i pojam brdsko-biciklističke staze namijenjene za planinski biciklizam sa jasnom definicijom koja glasi:

„Planinska staza namijenjena za planinski biciklizam (brdsko-biciklistička staza) je uski pojas zemljišta označen propisanim markacijama, na brdovitom, šumskom ili planinskom prostoru namijenjen prvenstveno za kretanje biciklom.“

Amandman II.

U članu 16. u stavu 2. riječi: „kantonalnih zavoda za zaštitu prirode“ mijenjaju se riječima: „nadležnih kantonalnih tijela“.

Amandman III.

U članu 35. stav 5. se briše.

Amandman IV.

U članu 36. u stavu 2. iza riječi: „Federalni zavod“ dodaju se riječi: „u saradnji sa nadležnim kantonalnim tijelima uprave“.

Amandman V.

U članu 67. u stavu 4. iza riječi: „Federalnog zavoda“ dodaju se riječi: „i nadležnih kantonalnih tijela“.

Amandman VI.

U članu 134. st. 2. i 3. se brišu.

Amandman VII.

U članu 144. u stavu 3. iza riječi: „Parlament Federacije“ dodaju se riječi: „uz saglasnost zakonodavnih tijela kantona“.

Amandman VIII.

U članu 237. stav 3. se briše.

Amandman IX.

U članu 122. umjesto riječi: „naslijeđa“ ubaciti riječi: „dezoksiribonukleinske kiseline“.

Amandman X.

U članu 131. stav 3. se briše.

Amandman XI.

U članu 144. dodaje se stav 5. koji glasi:

„Uspostava zaštićenih područja na federalnom ili kantonalnom nivou može se provoditi uz saglasnost općinskih vijeća na čijim područjima se prema prostornom planu prostire zaštićeno područje.“

Amandman XII.

U članu 151. iza stava 3. dodaje se stav 4. koji glasi:

„Pored postojećih javnih preduzeća i javnih ustanova koje su osnovali Vlada Federacije i vlade kantona mogu se formirati nova javna poduzeća i javne ustanove samo uz prethodnu odluku Parlamenta Federacije, odnosno skupština kantona.“

Amandman XIII.

U članu 166. u stavu 3. umjesto riječi: „u roku 90 dana“ treba pisati: „u roku 30 dana“.

Amandman Predstavničkog doma koji je Dom naroda izglasao:

U članu 174. stav 1. se u potpunosti briše i dodaje se stav 1. sljedećeg sadržaja:

„Pravno lice koje upravlja zaštićenom vrstom/podvrstom dužno je na primjeren način i svoj trošak učiniti sve dozvoljene radnje i zahvate kako bi spriječilo nastanak štete pravnom ili fizičkom licu.“

Stav 2. ostaje nepromijenjen.

Prijedlog Zakona razmatrala su nadležna radna tijela i dostavila izvještaje.

Prijedlog Zakona obrazložio je Mehmed Cero, pomoćnik federalne ministricе okoliša i turizma.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda Parlamenta Federacije BiH, sa 34 glasa za, uz jedan glas protiv i uz pet uzdržanih glasova, usvojio Amandman koji je usvojio Predstavnički dom, a glasi:

„U članu 174. stav 1. se u potpunosti briše i dodaje se stav 1. sljedećeg sadržaja:

„Pravno lice koje upravlja zaštićenom vrstom/podvrstom dužno je na primjeren način i svoj trošak učiniti sve dozvoljene radnje i zahvate kako bi spriječilo nastanak štete pravnom ili fizičkom licu.“

Stav 2. ostaje nepromijenjen.“

Potom se glasalo o Prijedlogu Zakona.

Sa 43 glasa za i uz tri uzdržana glasa, predsjedavajući je konstatovao da je Dom naroda Parlamenta Federacije BiH usvojio Prijedlog Zakona o zaštiti prirode.

9. Prijedlog Zakona o poljoprivrednim savjetodavnim službama

Prijedlog Zakona utvrdila je Vlada Federacije.

Predstavnički dom Parlamenta Federacije BiH obavijestio je Dom naroda da je na nastavku 20. sjednice, održane 2.7.2013. godine, usvojio Prijedlog Zakona sa četiri amandmana koje je prihvatila Vlada Federacije pa su postali sastavni dio Prijedloga Zakona.

Amandman I.

U članu 4. u stavu 4. riječi: „za period od pet godina“ zamijeniti riječima: „za period od sedam godina“.

Amandman II.

U članu 8. u stavu 2. iza alineje 6. dodati alineju 7. koja glasi:

„- propisuje program, uvjete i način polaganja stručnog ispita za savjetodavca“.

Ostale alineje ostaju kako je u predloženom tekstu.

Amandman III.

U članu 17. iza riječi: „upisuje u“ dodati riječi: „središnji registar službi“.

Daljnji tekst ostaje nepromijenjen.

Amandman IV.

U članu 30. u stavu 2. u četvrtom redu riječ: „godinu“ zamijeniti riječima: „dvije godine“.

Prijedlog Zakona su razmatrala nadležna radna tijela i dostavila izvještaje.

Prijedlog Zakona obrazložio je Nijaz Brković, pomoćnik federalnog ministra poljoprivrede, vodoprivrede i šumarstva.

Na Prijedlog Zakona tri amandmana je podnio Mijo Matanović od kojih je u raspravi odustao.

Mustafa Kurtović, predsjednik Odbora za poljoprivredu, vodoprivredu i šumarstvo, obrazložio je Izvještaj Odbora.

U raspravi je učestvovao Mijo Matanović.

Sa 37 glasova za i uz osam uzdržanih glasova, predsjedavajući je konstatovao da je Dom naroda Parlamenta Federacije BiH usvojio Prijedlog Zakona o poljoprivrednim savjetodavnim službama.

10. Prijedlog Zakona o stočarstvu

Prijedlog Zakona utvrdila je Vlada Federacije.

Predstavnički dom Parlamenta Federacije BiH obavijestio je Dom naroda da je na nastavku 20. sjednice, održane 2.7.2013. godine, usvojio Prijedlog Zakona sa pet amandmana koje je prihvatila Vlada Federacije, pa su postali sastavni dio Prijedloga Zakona.

Amandman I.

U članu 33. u stavu 5. riječi: „Federalno ministarstvo“ zamijeniti riječima: „kantonalno ministarstvo“.

Amandman II.

U članu 33. stav 5. mijenja se i glasi:

„U slučaju da je vlasnik domaćih životinja koje su prouzrokovale štetu nepoznat, životinje zatečene na tuđem imanju, odnosno poljoprivrednom zemljištu, nadležno kantonalno ministarstvo i nadležna inspekcija imaju pravo ukloniti i te trajno zbrinuti, odnosno prodati radi namirenja učinjene štete.“

Amandman III.

U članu 38. u stavu 2. riječi: „organi lokalne samouprave (kantoni)“ zamijeniti riječima: „kantoni i organi lokalne samouprave“.

Amandman IV.

U članu 4. stav 4. mijenja se i glasi:

„Uzgojne programe iz stava 1. ovog člana donosi federalni ministar poljoprivrede, vodoprivrede i šumarstva (u daljnjem tekstu: federalni ministar) na prijedlog ovlaštene ustanove, uz mišljenje kantonalnog ministarstva.“

Amandman V.

U članu 27. prvi dio stava 2. mijenja se i glasi:

„Uzgojno valjane životinje i genetski materijal mogu uvoziti pravna lica ako je uvoz u skladu sa programom uzgoja pojedine vrste ili pasmine stoke, uz pozitivno mišljenje kantonalnog ministarstva i stručno mišljenje ovlaštenih ustanova.“

Prijedlog Zakona su razmatrala nadležna radna tijela i dostavila izvještaje.

Prijedlog Zakona obrazložio je Nijaz Brković, pomoćnik federalnog ministra poljoprivrede, vodoprivrede i šumarstva.

Na Prijedlog Zakona tri amandmana je podnio Ivo Tadić od kojih je u raspravi odustao.

Mustafa Kurtović, predsjednik Odbora za poljoprivredu, vodoprivredu i šumarstvo, obrazložio je Izvještaj Odbora.

U raspravi nije niko učestvovao.

Sa 36 glasova za i uz osam uzdržanih glasova, predsjedavajući je konstatovao da je Dom naroda Parlamenta Federacije BiH usvojio Prijedlog Zakona o stočarstvu.

11. Prijedlog Zakona o stvarnim pravima

Prijedlog Zakona utvrdila je Vlada Federacije.

Predstavnički dom Parlamenta Federacije BiH obavijestio je Dom naroda da je na nastavku 20. sjednice, održane 2.7.2013. godine, usvojio Prijedlog Zakona sa jednim amandmanom koji je podnijela Vlada Federacije, pa je postao sastavni dio Prijedloga Zakona.

Amandman glasi:

Član 356. mijenja se i glasi:

„Ako suvlasnici ne sklope ugovor sa upravnikom iz člana 355. ovog zakona, jedinica lokalne samouprave odredit će fizičko ili pravno lice za obavljanje hitnih popravki na toj nekretnini.

Hitnim popravcima smatraju se radovi koji se javljaju nenadano i kojima se sprečavaju štetne posljedice za život i zdravlje ljudi kao i veća oštećenja nekretnine.

Kad zbog oštećenja zajedničkih dijelova i uređaja nekretnine postoji opasnost za život i zdravlje ljudi nadležni organ naredit će upravniku nekretnine, odnosno suvlasnicima, ako nemaju upravnika, izvršenje nužnih popravaka.

Potraživanje naplate troškova popravka iz stava 3. ovog člana tražilac izvršenja ostvarit će prema odredbama Zakona o izvršnom postupku.“

Prijedlog Zakona su razmatrala nadležna radna tijela i dostavila izvještaje.

Prijedlog Zakona obrazložio je Zoran Mikulić, federalni ministar pravde.

U raspravi je učestvovao Zoran Jovanović.

Sa 36 glasova za, uz jedan glas protiv i uz šest uzdržanih glasova, predsjedavajući je konstatovao da je Dom naroda Parlamenta Federacije BiH usvojio Prijedlog Zakona o stvarnim pravima.

12. Prijedlog Zakona o izmjenama i dopunama Zakona o ministarskim, vladinim i drugim imenovanjima Federacije BiH

Prijedlog Zakona utvrdila je Vlada Federacije.

Predstavnički dom Parlamenta Federacije BiH obavijestio je Dom naroda da je na nastavku 20. sjednice, održane 2.7.2013. godine, usvojio Prijedlog Zakona sa dva amandmana koje je prihvatila Vlada Federacije, pa su postali sastavni dio Prijedloga Zakona.

Amandmani glase:

Amandman I.

U članu 12. riječi: „32/01“ se brišu.

Amandman II.

U članu 13. u stavu 2. iza riječi: „Bosne i Hercegovine“ piše se tačka, a ostatak teksta se briše.

Prijedlog Zakona su razmatrala nadležna radna tijela i dostavila izvještaje.

Prijedlog Zakona obrazložio je Zoran Mikulić, federalni ministar pravde.

U raspravi nije niko učestvovao.

Sa 41 glasom za i uz šest uzdržanih glasova, predsjedavajući je konstatovao da je Dom naroda Parlamenta Federacije BiH usvojio Prijedlog Zakona o izmjenama i dopunama Zakona o ministarskim, vladinim i drugim imenovanjima Federacije BiH.

13. Prijedlog Zakona o izmjenama i dopunama Zakona o cestama Federacije BiH

Prijedlog Zakona utvrdila je Vlada Federacije.

Predstavnički dom Parlamenta Federacije BiH obavijestio je Dom naroda da je na nastavku 20. sjednice, održane 2.7.2013. godine, usvojio Prijedlog Zakona u tekstu kako ga je predložila Vlada Federacije.

Prijedlog Zakona su razmatrala nadležna radna tijela i dostavila izvještaje.

Prijedlog Zakona obrazložio je Pavo Boban, pomoćnik federalnog ministra prometa i komunikacija.

Na Prijedlog Zakona amandman je podnio Radoje Vidović od kojeg je kasnije odustao.

U raspravi nije niko učestvovao.

Sa 37 glasova za, uz četiri glasa protiv i uz četiri uzdržana glasa, predsjedavajući je konstatovao da je Dom naroda Parlamenta Federacije BiH usvojio Prijedlog Zakona o izmjenama i dopunama Zakona o cestama Federacije BiH.

14. Prijedlog Zakona o izmjenama i dopunama Zakona o porezu na dohodak - hitni postupak

Prijedlog Zakona utvrdila je Vlada Federacije.

Predstavnički dom Parlamenta Federacije BiH obavijestio je Dom naroda da je na 21. sjednici, održanoj 23.7.2013. godine, usvojio Prijedlog Zakona u tekstu kako ga je predložila Vlada Federacije.

Prijedlog Zakona obrazložio je Ante Krajina, federalni ministar finansija.

U raspravi nije niko učestvovao.

Sa 37 glasova za, predsjedavajući je konstatovao da je Dom naroda Parlamenta Federacije BiH usvojio Prijedlog Zakona o izmjenama i dopunama Zakona o porezu na dohodak.

15. Nacrt Zakona o izmjenama i dopunama Zakona o lovstvu

Zakon u formi prijedloga utvrdila je Vlada Federacije.

Predstavnički dom Parlamenta Federacije BiH obavijestio je Dom naroda da je na 20. sjednici, održanoj 25.6. i 2.7.2013. godine, u prethodnom postupku odlučio da se Zakon razmatra u formi nacrta i Zaključkom ga prihvatio.

Nacrt Zakona su razmatrala nadležna radna tijela i dostavila izvještaje.

Nacrt Zakona obrazložila je Danica Šimunović, pomoćnica federalnog ministra poljoprivrede, vodoprivrede i šumarstva.

Mustafa Kurtović, predsjednik Odbora za poljoprivredu, vodoprivredu i šumarstvo, obrazložio je Izvještaj Odbora.

U raspravi nije niko učestvovao.

Sa 42 glasa za, uz jedan glas protiv i uz tri uzdržana glasa, predsjedavajući je konstatovao da je Dom naroda Parlamenta Federacije BiH usvojio sljedeći:

ZAKLJUČAK

1. Dom naroda Parlamenta Federacije BiH prihvaća Nacrt Zakona o izmjenama i dopunama Zakona o lovstvu i smatra da može poslužiti kao osnov za izradu prijedloga Zakona.
2. Zadužuje se Vlada Federacije da prilikom izrade prijedloga Zakona ima u vidu primjedbe, prijedloge i sugestije iznesene na sjednici.

16. Nacrt Zakona o šumarstvu (predlagači: Slaviša Šućur i Enver Mujala, zastupnici u Predstavničkom domu Parlamenta Federacije BiH)

Predstavnički dom Parlamenta Federacije BiH obavijestio je Dom naroda da je na 8. sjednici, održanoj 24.11.2011. godine, razmatrao Nacrt Zakona i Zaključkom ga prihvatio. Tom prilikom je Zakon stavljen na javnu raspravu.

Dom naroda Parlamenta Federacije BiH je na 7. sjednici, održanoj 8.12.2011. godine, u prethodnom postupku odlučio da odloži raspravu o Nacrtu Zakona dok nadležni kantonalni organi ne dostave svoja mišljenja o ovom zakonu.

Određeni broj kantonalnih skupština i drugih subjekata dostavilo je primjedbe, prijedloge i sugestije na Nacrt Zakona koji su delegatima dostavljeni.

Nacrt Zakona su razmatrala nadležna radna tijela i dostavila izvještaje.

Mustafa Kurtović, predsjednik Odbora za poljoprivredu, vodoprivredu i šumarstvo, obrazložio je Izvještaj Odbora i predložio da se obaveže Vlada Federacije da što hitnije dostavi Zakon o šumarstvu u parlamentarnu proceduru.

Sa 42 glasa za, uz jedan glas protiv i uz tri uzdržana glasa, predsjedavajući je konstatovao da je Dom naroda Parlamenta Federacije BiH usvojio sljedeći:

ZAKLJUČAK

Zadužuje se Vlada Federacije BiH da što hitnije izradi i u parlamentarnu proceduru uputi Nacrt Zakona o šumarstvu.

17. Nacrt Prostornog plana područja posebnih obilježja od značaja za Federaciju BiH „Sliv rijeke Une“ 2007.-2027. godina

Nacrt Plana utvrdila je Vlada Federacije BiH.

Predstavnički dom Parlamenta Federacije BiH obavijestio je Dom naroda da je na nastavku 17. sjednice, održane 29.11.2012. godine, razmatrao Nacrt Plana i Zaključkom ga prihvatio.

Nacrt su razmatrala nadležna radna tijela i dostavila izvještaje.

Nacrt Plana obrazložio je Hajrudin Srna, predstavnik federalnog ministra prostornog uređenja.

U raspravi nije niko učestvovao.

Sa 41 glasom za, uz jedan uzdržani glas i uz dva glasa protiv, predsjedavajući je konstatovao da je Dom naroda Parlamenta Federacije BiH usvojio sljedeći:

ZAKLJUČAK

Dom naroda Parlamenta Federacije BiH prihvaća Nacrt Prostornog plana područja posebnih obilježja od značaja za Federaciju BiH „Sliv rijeke Une“ 2007.-2027. godina i smatra da može poslužiti kao osnov za izradu prijedloga Prostornog plana.

18. Nacrt Zakona o preuzimanju dioničkih društava

Nacrt Zakona utvrdila je Vlada Federacije BiH.

Predstavnički dom Parlamenta Federacije BiH obavijestio je Dom naroda da je na nastavku 15. sjednice, održane 30.5.2012. godine, razmatrao Nacrt Zakona i Zaključkom ga prihvatio. Tom prilikom je Zakon stavljen na javnu raspravu.

Nacrt Zakona su razmatrala nadležna radna tijela i dostavila izvještaje.

Nacrt Zakona obrazložio je Ante Krajina, federalni ministar finansija.

U raspravi su učestvovali: Elvira Abdić-Jelenović i Zoran Jovanović.

Sa 44 glasa za, uz jedan glas protiv i uz jedan uzdržani glas, predsjedavajući je konstatovao da je Dom naroda Parlamenta Federacije BiH usvojio sljedeći:

ZAKLJUČAK

1. Dom naroda Parlamenta Federacije BiH prihvaća Nacrt Zakona o preuzimanju dioničkih društava i smatra da može poslužiti kao osnov za izradu prijedloga Zakona.
2. Zadužuje se Vlada Federacije da organizira i provede javnu raspravu u trajanju 30 dana.

3. Zadužuje se Vlada Federacije da prilikom izrade prijedloga Zakona ima u vidu primjedbe, prijedloge i sugestije iznesene na sjednici, kao i one iznesene u javnoj raspravi.

19. Nacrt Zakona o unutrašnjim poslovima Federacije BiH

Nacrt Zakona utvrdila je Vlada Federacije BiH.

Predstavnički dom Parlamenta Federacije BiH obavijestio je Dom naroda da je na nastavku 12. sjednice, održane 29.2.2012. godine, razmatrao Nacrt Zakona i Zaključkom ga prihvatio. Tom prilikom je Zakon stavljen na javnu raspravu.

Nacrt Zakona su razmatrala nadležna radna tijela i dostavila izvještaje.

Nacrt Zakona obrazložio je Predrag Kurteš, federalni ministar unutrašnjih poslova.

U raspravi su učestvovali: Predrag Kojović, Amir Zukić, Mira Ljubijankić, Aner Žuljević, Tomislav Martinović i Josip Perić.

Sa 30 glasova za, uz tri glasa protiv i uz 12 uzdržanih glasova, predsjedavajući je konstatovao da je Dom naroda Parlamenta Federacije BiH usvojio sljedeći:

ZAKLJUČAK

1. Dom naroda Parlamenta Federacije BiH prihvaća Nacrt Zakona o unutrašnjim poslovima Federacije BiH i smatra da može poslužiti kao osnov za izradu prijedloga Zakona.
2. Zadužuje se Vlada Federacije da u saradnji sa nadležnim radnim tijelima Doma naroda Parlamenta Federacije BiH organizira i provede javnu raspravu u trajanju 60 dana.
3. Zadužuje se Vlada Federacije da prilikom izrade prijedloga Zakona ima u vidu primjedbe, prijedloge i sugestije iznesene na sjednici, kao i one iznesene u javnoj raspravi.

20. Prijedlog Strategije razvoja industrije tekstila, odjeće, kože i obuće u Federaciji BiH za period 2013. – 2023. godina

Vlada Federacije BiH je Parlamentu Federacije dostavila Prijedlog Strategije razvoja industrije tekstila, odjeće, kože i obuće u Federaciji BiH za period 2013. – 2023. godina radi razmatranja i usvajanja.

Predstavnički dom Parlamenta Federacije BiH obavijestio je Dom naroda da je na nastavku 20. sjednice, održane 2.7.2013. godine, usvojio Prijedlog Strategije razvoja industrije tekstila, odjeće, kože i obuće u Federaciji BiH za period 2013. – 2023. godina.

Prijedlog Strategije su razmatrala nadležna radna tijela i dostavila izvještaje.

Prijedlog Strategije obrazložio je Marinko Bošnjak, pomoćnik federalnog ministra energije, rudarstva i industrije.

U raspravi su učestvovali: Senahid Šaković, Sretko Radišić i Hajrudin Bećirović.

Sa 42 glasa za i uz dva uzdržana glasa, predsjedavajući je konstatovao da je Dom naroda Parlamenta Federacije BiH usvojio Prijedlog Strategije razvoja industrije tekstila, odjeće, kože i obuće u Federaciji BiH za period 2013. – 2023. godina.

21. a) Izvještaj "Zdravstveno stanje stanovništva i zdravstvena zaštita u Federaciji BiH - 2011. godina" sa Odlukom o prihvatanju Izvještaja "Zdravstveno stanje stanovništva i zdravstvena zaštita u Federaciji BiH - 2011. godina"

b) Obračun sredstava u zdravstvu u Federaciji BiH za 2011. godinu sa Odlukom o prihvatanju Obračuna sredstava u zdravstvu u Federaciji BiH za 2011. godinu

Vlada Federacije BiH je dostavila Parlamentu Federacije Obračun sredstava u zdravstvu u Federaciji BiH za 2011. godinu sa Odlukom o prihvatanju Obračuna sredstava u zdravstvu u Federaciji BiH za 2011. godinu i Izvještaj "Zdravstveno stanje stanovništva i zdravstvena zaštita u Federaciji BiH - 2011. godina" sa Odlukom o prihvatanju Izvještaja "Zdravstveno stanje stanovništva i zdravstvena zaštita u Federaciji BiH - 2011. godina" radi razmatranja i usvajanja.

Predstavnički dom Parlamenta Federacije BiH obavijestio je Dom naroda da je na nastavku 19. sjednice, održane 7.5.2013. godine, Zaključkom prihvatio Obračun sredstava u zdravstvu u Federaciji BiH za 2011. godinu i Izvještaj "Zdravstveno stanje stanovništva i zdravstvena zaštita u Federaciji BiH - 2011. godina".

Ove akte su razmatrala nadležna radna tijela i dostavila izvještaje.

U raspravi nije niko učestvovao.

Sa 40 glasova za i uz četiri uzdržana glasa, predsjedavajući je konstatovao da je Dom naroda Parlamenta Federacije BiH usvojio sljedeći

ZAKLJUČAK

Dom naroda Parlamenta Federacije BiH usvaja Obračun sredstava u zdravstvu u Federaciji BiH za 2011. godinu sa Izvještajem "Zdravstveno stanje stanovništva i zdravstvena zaštita u Federaciji BiH - 2011. godina".

22. Statut Zavoda za transfuzijsku medicinu Federacije BiH

Statut je prihvatila Vlada Federacije i dostavila ga Parlamentu Federacije radi davanja saglasnosti.

Predstavnički dom Parlamenta Federacije BiH obavijestio je Dom naroda da je na nastavku 20. sjednice, održane 2.7.2013. godine, donio Odluku o davanju saglasnosti na Statut Zavoda za transfuzijsku medicinu Federacije BiH.

Statut su razmatrala nadležna radna tijela i dostavila izvještaje.

Statut je obrazložio Rusmir Mesihović, federalni ministar zdravstva.

U raspravi nije niko učestvovao.

Sa 44 glasa za i uz jedan uzdržani glas, predsjedavajući je konstatovao da je Dom naroda Parlamenta Federacije BiH donio Odluku o davanju saglasnosti na Statut Zavoda za transfuzijsku medicinu Federacije BiH.

23. Statut Univerzitetskog kliničkog centra Sarajevo

Statut je prihvatila Vlada Federacije i dostavila ga Parlamentu Federacije radi davanja saglasnosti.

Predstavnički dom Parlamenta Federacije BiH obavijestio je Dom naroda da je na nastavku 20. sjednice, održane 2.7.2013. godine, donio Odluku o davanju saglasnosti na Statut Univerzitetskog kliničkog centra Sarajevo.

Statut su razmatrala nadležna radna tijela i dostavila izvještaje.

Statut je obrazložio Rusmir Mesihović, federalni ministar zdravstva.

U raspravi su učestvovali Amir Zukić i Rusmir Mesihović.

Sa 37 glasova za, uz jedan glas protiv i uz sedam uzdržanih glasova, predsjedavajući je konstatovao da je Dom naroda Parlamenta Federacije BiH donio Odluku o davanju saglasnosti na Statut Univerzitetskog kliničkog centra Sarajevo.

24. Statut Univerzitetske kliničke bolnice Mostar

Statut je prihvatila Vlada Federacije i dostavila ga Parlamentu Federacije radi davanja saglasnosti.

Predstavnički dom Parlamenta Federacije BiH obavijestio je Dom naroda da je na 21. sjednici, održane 24.7.2013. godine, donio Odluku o davanju saglasnosti na Statut Univerzitetske kliničke bolnice Mostar.

Statut su razmatrala nadležna radna tijela i dostavila izvještaje.

U raspravi nije niko učestvovao.

Sa 45 glasova za i uz jedan uzdržani glas, predsjedavajući je konstatovao da je Dom naroda Parlamenta Federacije BiH donio Odluku o davanju saglasnosti na Statut Univerzitetske kliničke bolnice Mostar.

25. Statut Javne zdravstvene ustanove Univerzitetsko-klinički centar Tuzla

Statut je prihvatila Vlada Federacije i dostavila ga Parlamentu Federacije radi davanja saglasnosti.

Predstavnički dom Parlamenta Federacije BiH obavijestio je Dom naroda da je na nastavku 21. sjednici, održane 24.7.2013. godine, donio Odluku o davanju saglasnosti na Statut Javne zdravstvene ustanove Univerzitetsko-klinički centar Tuzla.

Statut su razmatrala nadležna radna tijela i dostavila izvještaje.

U raspravi nije niko učestvovao.

Sa 42 glasa za i uz pet uzdržanih glasova, predsjedavajući je konstatovao da je Dom naroda Parlamenta Federacije BiH donio Odluku o davanju saglasnosti na Statut Javne zdravstvene ustanove Univerzitetsko-klinički centar Tuzla.

26. Izvještaj Visokog sudskog i tužilačkog vijeća BiH za 2011. godinu

Budući da nije bilo predlagača za ovu tačku dnevnog reda ona je skinuta sa dnevnog reda ove sjednice.

Sjednica je završena u 16.10.

Transkript sjednice čini sastavni dio Zapisnika.

SEKRETAR

Izmir Hadživdić

PREDSJEDAVALAČ

Radoje Vidović